



INFO CBBiH



U ovom broju:PODACI O KARTIČNOM
POSLOVANJU ZA 2017. GODINUIZVJEŠTAJ „PLATNI SISTEMI U
2017. GODINI“GUVERNER SOFTIĆ NA 6. SUSRETU
GUVERNERA CENTRALNIH
BANAKA REGIJE I LIDERA
FINANSIJSKOG SEKTORAGUVERNER CBBIH PREDVODIO
DELEGACIJU BIH NA
PROLJETNOM ZASJEDANJU MMF
I SB U WASHINGTONUCBBIH UPLATILA DIO DOBITI NA
RAČUN BUDZETA INSTITUCIJA BiHSTUDENTI PRESTIZNOG
AMERICKOG UNIVERZITETA YALE
POSJETILI CBBIHDEBATOM SREDNJSOKOLACA
U CBBIH OBLJEZENA SVjetska
SEDMICA NOVCAIzdavač: Centralna banka Bosne i Hercegovine;
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i
Služba za protokol i prevođenje

Web stranica: <http://www.cbbh.ba>
 E-mail: pr@cbbh.ba
 kontakt telefon: (033) 278 123

PODACI O KARTIČNOM POSLOVANJU ZA 2017. GODINU



Prema podacima Centralne banke Bosne i Hercegovine (CBBiH), na kraju 2017. godine usluge kartičnog poslovanja pružale su 24 komercijalne banke u BiH. Riječ je o globalnim brendovima: MasterCard, Visa, American Express i Diners, dok samo dvije banke nude jedinu domaću karticu – Bamcard.

Prošle godine, ukupan broj aktivnih kartica bio je 2.005.213, za razliku od 2016. godine kada je bilo 2.042.280 kartica kod građana BiH. To je smanjenje od 37.067 kartica u odnosu na 2016. godinu, ali se nije reflektovalo na iznos. Najzastupljenije su debitne kartice.

Vrijednost transakcija koje su protekle godine realizovane karticama u zemlji i inostranstvu, iznosila je 9.511.334.218 KM, što je povećanje za 719.953.149 KM u odnosu na 2016. godinu kada je vrijednost realizovanih transakcija bila 8.791.381.069 KM.

Od ukupne vrijednosti transakcija realizovanih upotrebom kartica u zemlji i inostranstvu, u 2017. godini, putem ATM aparata podignuto je, što u zemlji što u inostranstvu, gotovine u iznosu od 6.754.333.637 ili 71% vrijednosti, a na POS aparatima je realizovano 2.757.000.581 KM ili 29% vrijednosti. U protekloj godini postotak realizovane gotovine na ATM i POS uređajima je iznosio 81%, a vrijednost robe i usluga je iznosila samo 19% od ukupnog prometa putem kartica.

Ukupan broj transakcija u 2017. godini bio 78.902.847, a prosječna vrijednost jedne transakcije bila je 121 KM i veća je u odnosu na 2016. godinu za 9 KM. Prosječan godišnji

promet po jednoj kartici prošle godine iznosio je 4.743 KM, što predstavlja povećanje u odnosu na 2016. u visini od 439 KM.

U protekloj godini, na ATM i POS uređajima banaka u inostranstvu, građani BiH su, preko kartica izdatih u našoj zemlji, realizovali iznos od 529.460.973 KM, što je za 35.795.102 KM više u odnosu na godinu ranije. Od tog iznosa, na ATM i POS uređajima je podignuto gotovog novca 149.116.978 KM, a robe i usluga na POS uređajima je realizovano u visini od 380.343.995 KM.

Inostrani građani su karticama svojih banaka iz inostranstva, na ATM i POS uređajima banaka u BiH, u 2017. godini realizovali 1.740.228.080 KM, od čega je preko ATM i POS uređaja dignuto gotovine u iznosu od 1.212.928.661 KM, dok je robe i usluga preko POS uređaja realizovano u visini od 527.299.419 KM.

Banke intenzivno rade na uvođenju u ponudu sve većeg broja ATM i POS uređaja. U protekloj godini bilo je ukupno 1.539 instaliranih ATM uređaja i 27.458 POS uređaja, od toga 26.673 u trgovinama i 785 na šalterima banaka.

Sve banke u BiH nude internetsko bankarstvo ili neku vrstu elektronskog bankarstva. Podaci pokazuju izražen trend povećanja broja klijenata koji koriste ove usluge. Ovom vrstom usluge u 2017. godini obuhvaćeno je ukupno 490.859 subjekata, dok je u 2016. godini bilo ukupno 383.761 subjekat koji su koristili ovu uslugu. Od ukupnog broja korisnika internetskog ili neke vrste elektronskog bankarstva, 64.961 je bilo pravnih subjekata, a 425.898 fizičkih osoba.

IZVJEŠTAJ „PLATNI SISTEMI U 2017. GODINI“

Odjeljenje za platne sisteme Centralne banke Bosne i Hercegovine (CBBiH) objavilo je izvještaj „Platni sistemi u BiH u 2017. godini“ o radu platnih sistema u BiH, na osnovu podataka prikupljenih u 24 banke u BiH i internih podataka CBBiH.

U 2017. godini u platnim sistemima CBBiH zabilježen je rast broja transakcija kao i njihove vrijednosti. Tako je u 2017. godini zabilježeno 41.107.361 transakcija u ukupnoj vrijednosti od 96.243.249.000 KM. Od ukupnog broja transakcija, putem RTGS-a zabilježeno je 996.043 transakcija ukupne vrijednosti 79.855.384.343 KM, dok je putem žirokliringa zabilježeno 40.111.318 transakcija ukupne vrijednosti 16.387.864.656 KM. Udio broja RTGS transakcija u ukupnim transakcijama u 2017. godini iznosi 2%, dok je udio vrijednosti 83% te je za 1% veći u odnosu na godinu ranije. Udio žirokliringa u broju ukupnih transakcija iznosi 98%, a vrijednosti 17%.

Počevši od 1.3.2017. godine, CBBiH je uvela četiri poravnanja u platnom sistemu žirokliringa. Kao i prethodnih godina, komercijalne banke su više koristile vremenski period plasiranja platnih transakcija stimulisan nižom tarifom ponuđenom od strane CBBiH.

Kroz sistem klirinškog obračuna međunarodnih plaćanja sa Srbijom, u 2017. godini je plasirano ukupno 10.602 naloga čija je vrijednost bila 172.103.917 eura.

Za Jedinstveni registar transakcijskih računa broj pristupnih tačaka bio je 1.264. Podatke iz Jedinstvenog registra računa putem web pristupa preuzimalo je 27 komercijalnih banaka, deset mikrokreditnih organizacija, osam leasing kompanija i osiguranja te 88 ostalih institucija. U registru je 224.946 aktivnih i 75.236 blokiranih računa.

Organizacione jedinice CBBiH u 2017. godini izdale su ukupno 10.282 izvoda iz Jedinstvenog registra transakcijskih računa.

Podatke u Centralni registar kredita u 2017. godini dostavljalo je 27 komercijalnih banaka, 27 mikrokreditnih organizacija te 19 leasing kompanija, osiguranja i posebnih institucija. Ukupan broj pristupnih tačaka registru je 1.325.

Tokom 2017. godine je realizovano 41.107.361 međubankarsko plaćanje i 68.389.937 unutarbankarskih plaćanja. U procentima iskazano, u ukupnom broju transakcija, 38% je međubankarskih transakcija nasuprot 62% naloga plasiranih unutar banaka. Posmatrajući po vrijednosti, u 2017. godini je realizovano 96.243.249.000 KM ili 45% kroz naloge među bankama i 117.098.818.192 KM ili 55% unutar banaka.

GUVERNER SOFTIĆ NA 6. SUSRETU GUVERNERA CENTRALNIH BANAKA REGIJE I LIDERA FINANSIJSKOG SEKTORA

Guverner Centralne banke Bosne i Hercegovine (CBBiH) dr. Senad Softić učestvovao je u radu 6. susreta guvernera centralnih banaka regije i lidera finansijskog sektora.

Susret je održan 27.3.2018. godine u Rovinju, Republika Hrvatska. Ovaj skup, koji je održan u organizaciji Poslovog magazina „Lider“ i Hrvatske narodne banke, ove godine u fokusu je imao raspravu o temi izazova koji se nalaze pred ekonomijama zemalja regiona u svjetlu normalizacije monetarne politike u eurozoni, kao i rješavanja akumuliranih nekvalitetnih kredita (NPL).



Obrađujući temu mogućih učinaka normaliziranja monetarne politike, diskusija guvernera regije pokušala je dati odgovore na pitanje u kojoj će mjeri očekivano zaoštravanje globalnih finansijskih uvjeta utjecati na makroekonomske performanse tržišta u razvoju, posebice gledano iz kuta fiskalne učinkovitosti i finansijske stabilnosti. Svesni činjenice da potencijalni rast kamatnih stopa sa sobom može nositi usporenje kreditne i gospodarske aktivnosti, te mogući porast NPL-ova, cilj je bio vidjeti u kojoj su mjeri domaća poduzeća i potrošači izloženi kamatnom riziku i koje im mjere eventualno stope na raspolaganju.

„CBBiH, zbog aranžmana valutnog odbora, ne može utjecati na visinu kamatnih stopa u zemlji. Od makroprudencijalnih mjera na raspolaganju joj je samo obvezna pričuva. Kontinuirano pratimo i analiziramo potencijalne učinke monetarne politike vodećih ekonomija svijeta. U ovisnosti o vrsti rizika, rizika likvidnosti u bankarskom sektoru ili rizika od nekontroliranog prekograničnog odljeva strane efektive, CBBiH će koristiti instrument obvezne pričuve u svim njegovim segmentima, po potrebi“, rekao je guverner Softić, dodavši da ukoliko prije ili kasnije dođe do rasta kamatnih stopa, očekuje se njihov postupan rast, te ne bi trebalo predstavljati značajnu kočnicu gospodarskog razvoja.

„Male i otvorene ekonomije, kao što je Bosna i Hercegovina, prvenstveno se trebaju fokusirati na strukturne reforme, povećanje učinkovitosti gospodarstva, učiniti ga izvozno konkurentnim i otpornim na vanjske šokove“, zaključio je guverner Softić svoje izlaganje.

GUVERNER CBBIH PREDVODIO DELEGACIJU BIH NA PROLJETNOM ZASJEDANJU MMF I SB U WASHINGTONU



**SPRING
MEETINGS
2018 | WASHINGTON DC**
**INTERNATIONAL MONETARY FUND
WORLD BANK GROUP**

Guverner Centralne banke Bosne i Hercegovine (CBBiH) dr. Senad Softić predvodio je delegaciju Bosne i Hercegovine, koju je u Washingtonu od 21. do 23. aprila prisustvovala sastancima održanim tokom proljetnog zasjedanja Međunarodnog monetarnog fonda (MMF) i Svjetske banke (SB).

Delegacija su još sačinjavali premijer Federacije BiH Fadil Novalić, predstavnici Ministarstva finansija i rezorza BiH, te predstavnici entitetskih vlada. Održali su veći broj sastanaka sa visokim zvaničnicima MMF-a i SB, među kojima treba istaći susrete sa Taom Zhangom, zamjenikom izvršne direktorice MMF-a, Pouloom Thomsenom, direktorom Odjeljenja za Evropu u MMF-u, kao i Cyrilom Mullerom, potpredsjednikom SB za regiju istočne i središnje Europe.

Tokom sastanaka sa predstvincima MMF-a i SB razgovaralo se o aktualnim temama, sa posebnim fokusom na provedbu

preostalih mjera iz Pisma namjere sa MMF-om, te projektima finansiranim od strane SB.

Sa predstvincima MMF-a posebno su istaknute mjeru iz trećeg cilja iz Pisma namjere, a koje se odnose na očuvanje stabilnosti finansijskog sistema i pružanje prilika za kreditni rast. U tom smislu od velike je važnosti usvajanje zakona o Agenciji za osiguranje depozita BiH, utvrđivanje identične metodologije za određivanje sistemski važnih banaka, te priprema Memoranduma o razumijevanju u oblasti finansijske stabilnosti na način kako je to usaglašeno Pismom namjere. Visoki predstavnici MMF-a su iskazali spremnost i podršku provedbi svih preostalih mjera dogovorenih sa vlastima, a što će biti tema drugog pregleda provedbe mjera tokom posjete misije MMF-a Bosni i Hercegovini koja je planirana polovinom maja ove godine.

CBBIH UPLATILA DIO DOBITI NA RAČUN BUDŽETA INSTITUCIJA BIH



Centralna banka Bosne i Hercegovine (CBBiH) je 5. aprila 2018. godine uplatila iznos od 7.311.129,83 KM u budžet institucija BiH.

To je urađeno na osnovu Odluke Upravnog vijeća CBBiH o raspodjeli čistog profitu koji je CBBiH ostvarila u 2017. godini.

Neto dobit CBBiH za 2017. godinu iznosi 12.185.216,39 KM. U skladu s člankom 27. Zakona o CBBiH, od tog iznosa je na račun obveza prema budžetu institucija Bosne i Hercegovine transferirano 60% ili 7.311.129,83 KM, dok je 40% ili 4.874.086,56 KM raspoređeno u generalne rezerve CBBiH.

Na poslovanje CBBiH proteklih godina, konstantni pritisak vrše kamatni rashodi po osnovu negativne kamatne stope na depozite kod inostranih banaka u eurozoni. Finansijska tržišta eurozone su već duži period u znaku negativnih i niskih priloga na državne obveznice zemalja iz našeg investicionog spektra te izrazito negativnih kamatnih stopa na oročene depozite i depozite po viđenju kod inostranih banaka. Neizvjesni i negativni tržišni trendovi zajedno sa zakonskim okvirom ulaganja deviznih rezervi CBBiH su neminovno uticali na proces upravljanja deviznim rezervama i visinu prihoda od investiranja te se CBBiH suočava sa sve težim ostvarenjem pozitivnog finansijskog rezultata.

Ostvareni profit za 2017. godinu je rezultat racionalne politike upravljanja CBBiH koja je u 2017. godini ispunila svoj zakonski mandat održavanja monetarne stabilnosti, uz racionalni utrošak resursa. CBBiH i dalje uspjeva u vremenima negativne kamatne stope na tržištu eurozone ostvariti pozitivan finansijski rezultat, iako primarni cilj u centralnom bankarstvu nije ostvarenje profitu već održavanje monetarne stabilnosti.

PRIMJETAN POVEĆAN BROJ NAMJERNO OŠTEĆENIH NOVČANICA

U posljednje vrijeme, prilikom redovnih poslovnih procesa u radu s gotovim novcem uočen je povećan broj „oštećenih“ novčanica čije oštećenje je nastalo pisanjem/crtanjem na bijelom dijelu površine novčanice, kako grafitnom tako i hemijskom olovkom.

Oštećenja se najčešće odnose na upisivanje broja hemijskom olovkom na novčanici za koje se prepostavlja da je vezano za proces ručnog brojanja novčanica, gdje osoba koja broji novčanice na neodgovoran i nezakonit način mehanički upisuje olovkom neki iznos na novčanici, čime novčanicu direktno oštećuje za dalji opticaj. Takođe, nisu strani i slučajevi kada se novčanice oštećuju ručnim upisivanjem grafičkim ili hemijskim olovkama u smislu upisivanja teksta, crteža, simbola i slično.

Centralna banka Bosne i Hercegovine (CBBiH) i ovim putem skreće pažnju svim privrednim subjektima kao i građanima da se u bankarskoj praksi svako pisanje ili crtanje po novčanicama smatra namjernim oštećenjem novčanica koje su zakonsko sredstvo plaćanja.

U skladu sa Zakonom o Centralnoj banci Bosne i Hercegovine i Odlukom o postupanju s novčanicama i kovanim novcem konvertibilne marke koji je nepodoban za opticaj i oštećenim novčanicama efektivnog stranog novca („Službeni glasnik BiH“, 17/17 od 10. marta 2017. godine), CBBiH novac podnesen na zamjenu za koji sumnja, ima dokaz ili opravdan razlog da smatra da se radi o namjernom oštećenju, može oduzeti i uništiti bez nadoknade podnosiocu.

Stoga, CBBiH poziva sve privredne subjekte koji u svome radu rukuju s gotovim novcem da osobama koje vrše ove poslove skrenu pažnju da je najstrože zabranjeno pisati po novčanicama jer se time novčanice direktno oštećuju i takve novčanice se u konačnici moraju uništiti u CBBiH kao nepodobne za opticaj.

Istovremeno s povećanim brojem ovakve vrste oštećenja novca, povećan je i broj pritužbi građana da komercijalne banke ne žele izvršiti zamjenu bez obzira na način i stepen oštećenja. U skladu s gorenavednom Odlukom, komercijalne banke su dužne zamijeniti oštećene novčanice KM, pod uslovom da podnositelj zahtjeva (fizičko ili pravno lice) predloži više od 60% novčanice KM, koja je:

- a) u jednom dijelu i sadrži barem jedan serijski broj ili
- b) iz dva ili više dijelova i sadrži oba serijska broja,
- u punom iznosu i bez naknade.



Ukoliko novčanice ne ispunjavaju propisane uslove za zamjenu u komercijalnim bankama, iste se uz popunjeno Zahtjev za zamjenu oštećenog novca (dostupan na web stranici www.cbbh.ba) mogu predati u Centralni ured Centralne banke BiH u Sarajevu ili u Glavnu banku Republike Srpske Centralne banke BiH u Banjoj Luci. Podnositac zahtjeva (fizičko ili pravno lice) prilikom predaje oštećenih novčanica KM na zamjenu, dužan je navesti porijeklo novčanica KM, način na koji je došlo do oštećenja, šta se dogodilo s dijelovima koji nedostaju i navesti opis vrste mrlje, onečišćenja i drugog oštećenja na priloženoj novčanici KM. Takođe, u obavezi je dostaviti kopiju lične karte i dokaze kojima potvrđuje navode iz zahtjeva. CBBiH

za svaki pojedinačni slučaj, na osnovu podnesenog Zahtjeva s priloženom dokumentacijom, utvrđuje autentičnost i procjenjuje oštećenje, odnosno utvrđuje postojanje osnova za zamjenu oštećenih novčanica KM.

CBBiH i ovim putem ukazuje na potrebu i obavezu da se svi učesnici u gotovinskom platnom prometu prema novčanicama i kovanicama konvertibilne marke koje su zakonsko sredstvo plaćanja odnose odgovorno, a da se zamjena oštećenog novca obavlja u skladu s propisima objavljenim u službenim glasilima Bosne i Hercegovine.

STALNI ODBOR ZA FINANSIJSKU STABILNOST ODRŽAO REDOVNI SASTANAK

U Sarajevu je 15.3.2018. godine održan redoviti sastanak Stalnog odbora za financijsku stabilnost.

Sastankom je predsjedavao guverner Centralne banke Bosne i Hercegovine (CBBiH) dr. Senad Softić, a prisustvovali su predstavnici Ministarstva financija i rezervi Bosne i Hercegovine, Ministarstva financija Federacije Bosne i Hercegovine, Ministarstva financija Republike Srpske, predstavnik Agencije za bankarstvo Republike Srpske, direktor Agencije za bankarstvo Federacije Bosne i Hercegovine i direktor Agencije za osiguranje depozita Bosne i Hercegovine.

Pored opće ocjene o stabilnosti bankarskog sektora, na sastanku je razgovarano o reformama u financijskom sektoru koje su u prethodnom razdoblju realizirane, kao i o unapređenju suradnje i razmjene informacija članica Stalnog odbora za financijsku stabilnost u oblasti finansijske stabilnosti. Istaknuto je da je, u cilju daljnje harmonizacije zakonskog okvira za poslovanje banaka, naročito važno usvajanje novog Zakona o osiguranju depozita u bankama u BiH.

GUVERNER SOFTIĆ PRIMIO U POSJETU AMBASADORICU NR KINE



Ambasadorica Narodne Republike Kine u Bosni i Hercegovini Nj.E. Chen Bo posjetila je 22.3.2018. godine Centralnu banku Bosne i Hercegovine (CBBiH), gdje se sastala s guvernerom CBBiH dr. Senadom Softićem.

Tokom razgovora, guverner dr. Softić je upoznao ambasadoricu s najnovijim makroekonomskim indikatorima za BiH, te se i osvrnuo na stanje u bankarskom sektoru, gdje je istakao da je 2017. godinu obilježilo jačanje stabilnosti sektora kroz kontinuirani proces konsolidacije, te usvajanja nove zakonske regulative, čija je glavna odlika modernizacija i usklađivanje domaćih propisa s regulativom EU, što bi trebalo doprinijeti jačanju stabilnosti bankarskog sektora.

Guverner je istakao osobitu važnost usvajanja novog Zakona o osiguranju depozita u bankama BiH, a u cilju dalje harmonizacije zakonskog okvira za bankarski sektor.

Ambasadorica Bo je guvernera upoznala sa nekoliko inicijativa koje za cilj imaju unapređenje ekonomske razmjene između dvije države, čije će mogućnosti značajno porasti očekivanim ukidanjem viznog režima, što će omogućiti lakšu komunikaciju privrednika i razvoj sektora turizma.

Nj.E. Chen Bo je posebno naglasila interes vlade Narodne Republike Kine za investiranje u infrastrukturne projekte, kao i moguće oblike podrške malim i srednjim preduzećima u BiH.

STUDENTI PRESTIŽNOG AMERIČKOG UNIVERZITETA YALE POSJETILI CBBIH



U okviru posjete Bosni i Hercegovini, grupa od 35 studenata MBA studija prestižnog Univerziteta Yale posjetila je 14.3.2018. godine Centralnu banku Bosne i Hercegovine (CBBiH).

Jedan od ciljeva posjete Bosne i Hercegovine je da studentima budu predstavljene različite perspektive – od političkog vrha, preko domaćih i stranih kompanija, do nevladinih organizacija. Imajući u vidu značaj CBBiH za bosanskohercegovačku ekonomiju, studenti ovog američkog univerziteta su iskazali želju da se bolje upoznaju o instituciji i njenom radu. CBBiH je veoma zadovoljna zbog nastavka ovakve vrste saradnje s Univerzitetom Yale, imajući u vidu činjenicu da je ovo već druga grupa studenata ovog univerziteta koja posjeće CBBiH.

Posjeta je počela prikazivanjem korporativnog filma o CBBiH, nakon čega je upriličena i prezentacija o makroekonomskom modelu BiH tokom koje su studenti, velikim brojem pitanja, pokazali izuzetno interesovanje za instituciju, monetarnu politiku i makroekonomsku sliku BiH.

Ova posjeta i prezentacija su dio aktivnosti koje je CBBiH upriličila u okviru obilježavanja Svjetske sedmice novca (Global Money Week), a koja se već godinama obilježava u cijelom svijetu na inicijativu Međunarodnog pokreta za finansijsku edukaciju djece i omladine (Child and Youth Finance International).

DEBATOM SREDNJOŠKOLACA U CBBIH OBILJEŽENA SVJETSKA SEDMICA NOVCA



Obilježavajući Svjetsku sedmicu novca (Global Money Week), a u okviru finansijske edukacije koju među učenicima i studentima provodi, Centralna banka Bosne i Hercegovine (CBBiH) je, u saradnji s Evropskim fondom za jugoistočnu Evropu – Development Facility (EFSE – DF), 16.3.2018. godine organizovala debatu srednjoškolaca o temi „Gotovinsko plaćanje je povoljnije od bezgovotinskog“.

U debati su učestvovali učenici Katoličkog školskog centra „Sv. Josip“ iz Sarajeva i JU Srednjoškolski centar „Istočna Ilidža“ iz Istočnog Sarajeva. Sudije, u čijem sastavu su bili tri predstavnika CBBiH, pobjednicima su proglašili debatantsku ekipu JU Srednjoškolski centar „Istočna Ilidža“ iz Istočnog Sarajeva, a najboljim debatantom učenika ove škole Marka Mojsilovića.

Obje ekipe, od kojih je jedna bila afirmacijska (Katolički školski centar „Sv. Josip“ iz Sarajeva) i prezentirala argumente u korist gotovinskog plaćanja, a druga negacijska (JU Srednjoškolski centar „Istočna Ilidža“ iz Istočnog Sarajeva) koja je zastupala bezgotovinsko plaćanje, pokazale su izvanrednu pripremljenost i znanje u ovoj sferi finansija, zrelost svog razmišljanja i korektno apliciranje prema stavovima suprotne ekipe. U završnoj riječi suci su istakli kako je odluku o pobjedniku bilo teško donijeti s obzirom na dobro argumentovane stavove obje ekipe.

Organizovanje debate bila je prilika za upoznavanje učenika o pojedinim važnim temama iz oblasti finansijske edukacije, a istovremeno, CBBiH, u saradnji s EFSE – DF, obilježila je i Svjetsku sedmicu novca (Global Money Week) koja se već godinama



obilježava u cijelom svijetu na inicijativu Međunarodnog pokreta za finansijsku edukaciju djece i omladine (Child and Youth Finance International).

Obilježavanjem Svjetske sedmice novca provode se različite aktivnosti čiji je cilj inspirisati djecu i mlade da uče o vrijednostima i tokovima novca, štednji i njenom značaju i drugim pitanjima iz oblasti finansija. Na ovaj način želi se postići veći stepen finansijske pismenosti i uključenosti mладих i djece.

MATURANTI SARAJEVSKE TREĆE GIMNAZIJE POSJETILI CBBiH



Grupa od 22 maturanta sarajevske Treće gimnazije, s profesoricom, posjetila je 7.3.2018. godine Centralnu banku Bosne i Hercegovine (CBBiH) sa željom da se upozna s radom ove institucije.

Nakon obilaska postavke novca u auli CBBiH, gdje su im o novcu kroz historiju BiH govorili zaposleni u Odjeljenju trezora, učenicima je o zadacima, ciljevima i strukturi u CBBiH govorila viceguvernerka mr. Ernadina Bajrović te su tom prilikom učenici dobili osnovne informacije o radu institucije. Sudeći po postavljanju pitanja, učenici su bili vrlo zainteresovani saznati što je moguće više. Za njih je organizovan i kviz znanja iz oblasti finansija koji je realizovan u saradnji s Udruženjem „U plusu“, a čija je svrha naučiti djecu kako da racionalnije troše vlastiti novac, koje su prednosti rane štednje i osnovne karakteristike finansijskih proizvoda.

Učenici su iskazali zadovoljstvo i zahvalnost zbog realizovane posjete, a takođe i želju da se i tokom školske godine ostvari saradnja Treće gimnazije, CBBiH i Udruženja „U plusu“ u pogledu kontinuirane edukacije učenika.

CBBiH već duže vrijeme posvećuje pažnju finansijskom opismenjavanju djece i omladine, provodeći razne aktivnosti zasnovane na edukaciji. Naime, stajalište je CBBiH da je finansijsko opismenjavanje djece i mладих jako važno i korisno, jer predstavlja kvalitetnu osnovu sticanja znanja upravljanja novcem kao i vještina potrebnih za donošenje svakodnevnih finansijskih odluka. U razgovorima s pedagozima i profesorima osnovnih i srednjih škola koji su posjećivali CBBiH često je isticano da bi uvođenje predmeta vezano za finansijsku edukaciju bilo veoma korisno, jer finansijska edukacija stvara mogućnost da osoba bude finansijski pismena, a time i odgovorna za upravljanje novcem.

DIREKTORICE IZ KUVEYT TURK PARTICIPATION BANK POSJETILE CBBiH

Centralnu banku Bosne i Hercegovne (CBBiH) 26.4.2018. godine posjetile su direktorica Sektora za međunarodno bankarstvo i menadžerica za međunarodno bankarstvo Kuveyt Turk Participation Bank iz Istanbula Fatma Cinar i Sevde Nur Toprak.

Razlog njihovog boravka u Bosni i Hercegovini bio je učešće na Sarajevo Business Forumu 2018., ali su direktorice ove banke iskazale želju da posjete CBBiH i razgovaraju s njenim predstavnicima. U razgovoru s rukovoditeljicom Odjeljenja za bankarstvo mr. Eminom Ćeman i rukovoditeljicom Odjeljenja za finansijsku stabilnost Vesnom Papić, razmijenjene su informacije iz oblasti bankarskog sektora u Bosni i Hercegovini i Turskoj.

STANDARD&POOR'S POTVRDIO KREDITNI REJTING BiH

KREDITNI REJTING BiH:

B



B3



Međunarodna agencija Standard and Poor's potvrdila je kreditni rejting Bosne i Hercegovine, B sa stabilnim izgledima.

Rejting se bazira na činjenici da zemlja ima stabilan ekonomski rast, koji omogućava rast prihoda od indirektnih poreza koje Bosna i Hercegovina koristi za servisiranje vanjskog duga te da je relativno nisko zadužena i to uglavnom pod koncesionalnim uslovima.

Ova ocjena je bazirana na stabilnoj fiskalnoj poziciji zemlje te procjeni da će budžetski deficit ostati na istom nivou i tokom perioda smanjenog finansiranja iz vanjskih izvora, naveli su u obrazloženju analitičari agencije Standard and Poor's.

